

Enseignes, qui se lient au païs par le Mariage, & se nantissent de belles conceptions, qu'ils font valoir; que par les Soldats, qui trouvent de bons partis, & s'estendent par tout; les vns & les autres reconnoissans les aduantages, dont il est parlé cy dessus.

On ne peut omettre, sans vne extreme ingratitude, la reconnoissance qui est deuë, tant au Ministre de sa Maiesté, qu'à Messieurs de la Compagnie Generale des Indes Occidentales, qui par leurs soins & leurs liberalitez, ont vne bonne part au florissant estat, où se trouue [13] à present ce païs, & à l'establissement des Missions, qu'on vera dans toute cette Relation s'estendre à plus de 500. lieuës d'icy: pour la subsistance desquelles, ces Messieurs ne s'épargnent pas. Nous auons veu cette année onze vaisseaux mouillés à la rade de Quebec, chargez de toutes sortes de biens. Nous auons veu prendre terre, à vn grand nombre, tant d'hommes de trauail, que de filles, qui peuplent nostre colonnie, & augmētent nos campagnes. Nous voyons des troupeaux de moutons, & bon nombre de cheuaux, qui se nourrissent fort bien en ce païs, & y rendent de notables seruices. Et tout cela se faisant aux frais de sa Maiesté, nous oblige à reconnoistre tous ces effets de sa bonté Royale, par des vœux & des prieres, que nous [14] adressons incessamment au Ciel, & dont retentissent nos Eglises, pour la prosperité de sa personne sacrée, à laquelle seule est deuë toute la gloire, d'auoir mis ce païs en tel estat, que si les choses continuent à proportion de ce qui s'est fait depuis deux ans, nous méconnoissons le Canada, & nous verrons nos forests, qui sont déjà bien reculées, se changer en Villes & en Prouinces, qui pourront vn iour ressembler en quelque chose, à celles de France.